



KENYATAAN MEDIA

KEMENTERIAN PERDAGANGAN DALAM NEGERI
DAN KOS SARA HIDUP

No. 13 Persiaran Perdana, Presint 2,
62623 Putrajaya

No. Telefon : 03-8882 5562

No. Fax : 03-8882 5569

KPDN JAMIN BEKALAN BARANG KEPERLUAN TERUS MENCUKUPI

Kementerian Perdagangan Dalam Negeri dan Kos Sara Hidup (KPDN) terus komited memastikan bekalan barang asas kekal mencukupi khususnya menjelang Pilihan Raya Negeri yang semakin hampir.

Justeru, KPDN melalui Pasukan Penguat Kuasa Cawangan Sandakan, hari ini telah menjalankan pemeriksaan dan sesi advokasi di beberapa premis yang menawarkan program Sumbangan Asas Rahmah (SARA) dan Menu Rahmah.

Tinjauan ini bertujuan memastikan semua premis terlibat mematuhi garis panduan serta undang-undang di bawah bidang kuasa KPDN, demi menjamin bantuan sampai kepada golongan sasaran tanpa penyelewengan.

Pemantauan Harga dan Bekalan

Hasil pemeriksaan mendapati tiada kenaikan harga barang keperluan SARA, dan bekalan barangan asas di premis-premis seluruh Sabah adalah mencukupi. Pemeriksaan berkala akan terus dilaksanakan bagi memastikan tahap pematuhan kekal tinggi serta kestabilan harga di pasaran terpelihara.

Secara keseluruhannya, mulai 1 Januari hingga 10 Oktober 2025, KPDN telah menjalankan 117,655 pemeriksaan ke atas premis-premis di seluruh Sabah dengan merekodkan 1,437 kes dengan nilai rampasan berjumlah RM29,266,892.13.

Dalam konteks Sandakan pula, pada tempoh yang sama sebanyak 11,851 pemeriksaan telah dijalankan meliputi 6,865 premis di bandar dan 4,986 premis di luar bandar.

Hasilnya, sebanyak 160 kes direkodkan yang meliputi kes berkaitan harga (65 kes), timbang sukat (31 kes), harga mengelirukan (2 kes) dan bekalan (62 kes) dengan nilai rampasan mencecah RM3,321,156.00.

Pihak KPDN Sandakan turut menerima 180 aduan yang kesemuanya telah lengkap disiasat dengan tiada aduan yang tertunggak atau melibatkan Sistem Kawalan Petrol Bersubsidi (SKPS).

Pelaksanaan SARA *One-Off*

Kerajaan menyalurkan SARA *One-Off* sebanyak RM100 secara automatik melalui MyKad kepada warganegara berumur 18 tahun ke atas, bagi tempoh 31 Ogos hingga 31 Disember 2025. Pelaksanaan ini membuktikan komitmen Kerajaan MADANI dalam memastikan keperluan asas rakyat terjamin, khususnya golongan B40.

Peranan Menu Rahmah

Di Sandakan, program Menu Rahmah turut mendapat sambutan menggalakkan dengan penglibatan tujuh (7) pengusaha berdaftar, menawarkan hidangan mampu milik kepada masyarakat setempat. Premis berkenaan menawarkan hidangan pada harga rahmah dengan variasi menu setiap hari.

Inisiatif Menu Rahmah yang diperkenalkan pada 31 Januari 2023 oleh Allahyarham Datuk Seri Salahuddin Ayub kekal menjadi antara usaha penting Kerajaan untuk mengurangkan kos sara hidup rakyat.

Orang ramai boleh melayari portal rasmi ***menurahmah.kpdn.gov.my*** untuk mendapatkan lokasi premis Menu Rahmah yang berdaftar.

Komitmen Berterusan KPDN

Kerajaan melalui KPDN akan terus mempertingkatkan pemantauan dan penguatkuasaan, bagi memastikan integriti pasaran terjamin, harga barang kekal terkawal, dan hak pengguna sentiasa dilindungi. Sebarang kenaikan harga barang asas tanpa justifikasi munasabah akan dikenakan tindakan termasuk pengeluaran notis di bawah Akta Kawalan Harga dan Anti Pencatutan 2011.

Saluran Aduan Orang Awam

KPDN menggesa orang ramai untuk menyalurkan aduan atau maklumat melalui saluran berikut:

- i. Aplikasi Whatsapp: 019 8488000
- ii. Portal e-Aduan KPDN : <http://eaduan.kpdn.gov.my>;
- iii. Talian Aduan KPDN: 1-800-886-800;
- iv. Aplikasi Ez ADU KPDN (Android / iOS); dan
- v. QR Aduan Suri



YB SENATOR DATUK DR. HAJAH FUZIAH SALLEH

Timbalan Menteri Perdagangan Dalam Negeri
dan Kos Sara Hidup

Sandakan
12 Oktober 2025